

BUKANG-LIWAYWAY

● Maikling kuwento ni DALISAY SALGADO

ABALANG-ABALA si Luz sa pagharap sa kanyang mga panauhin. Mababakas sa kanyang mukha na siya'y maligayang-maligaya. Matatamis na ngiti ang kanyang isinasalubong sa mga dumarating. Ang salu-salo ay isang "Shower party" na handog sa kanya ng kanyang mga kaibigan alang-alang sa kanyang nalalapit na pakikipagisang dibdib kay Tony de Leon, batang-bata at makisig na tagapamahala ng isang katamtaman nguni't matatag na samahan.

Gabi na nang magsiwi ang mga panauhin. Ang pagod ni Luz ay hindi alintana. Ibang-iba siya ngayon kaysa noong mga nakaraang buwan. Siya noon ay malungkutin, bihirang ngumiti, at kung ngumiti man, ay walang kislap ang kanyang mga mata. Si Luz ay likas na masayahin, nguni't pinalungkot siya ng isang pangyayari.....

Noong una, siya ay napakamasayahin, palabiro at mahiligin sa mga kasayahan. Hindi siya gaanong matalino at pangkaraniwan lamang ang kanyang kagandahan. Hindi siya gaanong maputi, ang ilong niya ay di-gaanong matangos, nguni't ang kanyang mga mata ay parang makikislap na hiyas, mapupungay at punong-puno ng damdamin. Nasa huling taon na siya sa kolehiyo nang makilala niya si Eddie. Ipinakilala ito sa kanya ng isang kaibigan, habang sila ay kumakain sa "canteen." Nakisabay nang kumain si Eddie sa kanila, at dito nagsimula ang mabuting pagtitinginan nila ni Luz. Bawa't labasan, himihintay ni Eddie si Luz, at naging linguhang panauhin niya si Eddie sa kaniyang tahanan.

Si Eddie ay isang masipag at matalinong mag-aaral. Ang katalinuhan niya ay hindi pangkaraniwan. Madalas siyang maging pangulo ng iba't ibang samahan sa paaralan dahil sa kanyang mahusay na pangungulo at pamamahala. Lubhang ikinararangal ni Luz si Eddie. Gayon na lamang ang kanyang kagalakan nang ito'y magtapat sa kanya. Napagkayarian nilang lumagay sa tahimik pagkatapos nila ng pag-aaral. Si Eddie noon ay kumikita na, bagama't kaunti nga lamang. Si Luz naman ay may inaasahang gawain pagkatapos ng kanyang pag-aaral.

Madaling lumipas ang mga araw. Dumating ang araw ng pagtatapos. Lahat ay abala sa pagbahanda. Sa kanilang "graduation ball" ipinagtapat ni Eddie na siya ay nahirang na "scholar" ng kaniyang paaralan at ipadala sa Amerika upang magdalubhasa. Magkahaloung saya at lungkot ang nadama ni Luz. Saya, sapagka't isang karangalan kay Eddie ang mahirang na "scholar", at lungkot, sapagka't sila ay magkakarayo at maantala ang kanilang mga balak. Palibhasa'y ayaw ni Luz na maging hadlang sa pagtatamo ni Eddie ng tagumpay kaya hindi siya tumutol.

Habang nasa Amerika si Eddie ay nagpatuloy si Luz ng pag-aaral. Madalas silang magsulat, nguni't dumating ang panahon na padalang ng padalang ang mga sulat ni Eddie. Naisip ni Luz na baka kaya maraming gawain si Eddie kaya hindi kaagad ito nakaliliham. Isang araw, tumanggap siya ng isang liham mula kay Eddie. Hindi siya nagkantututo sa pagbubukas niyon. Isang larawan at isang "clipping" ang bumungad sa kanyang paningin. Nakalathala ang pakikipag-isang-dibdib ni Eddie sa isa ring "scholar" na Pilipina. Hindi niya nakuhang basahin pa ang kalakip na liham. Masaganan luha ang dumaloy sa kanyang mga mata.

Yaong pangyayaring yaon ang naging simula ng pagbabago ni Luz. Iniwasan na niya ang mga kasayahan at mga pagtitipon. Pati ang kanyang mga kaibigan ay iniwasan na rin niya. Datapwa't sa kabila ng paghabagong ito ay isang kaibigan ang naging matiyaga sa pakikitungo sa kanya. Kahit na kalimita'y tinatanggihan ni Luz ang kanyang mga tulong at paanyaya, si Tony ay hindi nawalan ng pag-asa. Hindi nga naglaon at nahimok ni Tony si Luz na magsayang muli at makihalubilo sa kanyang mga kaibigan. Natanto ni Luz na hindi siya dapat mabuhay sa piling ng kanyang kahapon. Paglipas ng araw ay naghahari ang dilim ng gabi, nguni't pagkalipas ng gabi'y muling sumisikat ang araw. Gayon din ang buhay ng tao, may araw at may gabi, may kalungkutan at may kaligayahan.

Lumipas ang maraming araw. Nanumbalik si Luz sa dating sarili. Masaya, palabiro at punong-puno ng buhay. Ang pagbabagong ito ay naganap sa tulong ni Tony.

Tulad ng inaasahan ni Luz ay nagtapat ng niluloob si Tony. Batid niya ang kadakilaan ng puso ng lalaking ito kaya hindi siya natakot na umibig pang muli.

Maagang-maagang nagising si Luz. Kay ganda ng bukung-liwayway na bumungad sa kanyang paningin! Sa kaunaunahang pagkaka-taon ay nadama niya ang lipos na kasayahan, isang damdaming hindi niya kayang malipalwanag. Ang gabi ng kanyang buhay ay lumipas na at isang maningning na bukung-liwayway at bagong buhay ang kanyang haharapin. Isang bagong buhay sa piling ni Tony.

— w a k a s —



Bantayog ng Kadakilaan

● Tuwing ginugunita natin ang kadakilaan ng ating mga bayani ay nagugunita rin natin ang kalupitan at kabagsikan ng mga dayuhan lumupig at bumihag sa ating inang bayan, kalupitang at kabagsikang naging batayan ng madugong paghihimagsik upang matamo ang kalayaang ngayoy ating tinatamasa na. Datapwa't sa kabila ng kalupitan at kabagsikang yaon ay may busilak na kabutihang naidulot ang mga dayuhan, kabutihang natatanim sa puso ng bawa't isang Pilipinong marunong tumana ng utang na loob. Kung hindi napadpad sa ating mga pasigan ang mga dayuhan, ay hindi sana nabuo ang bayang Pilipinas sa ilalim ng isang bandila. At lalo pang mahalaga, hindi sana napunla sa puso't diwa ng sambayanang Pilipino ang kawagasan ng isang banal na pananampalataya — ang pananampalatayang Katolika.

Maaaring hindi kaagad matatanggap ng balana na napakalaking bahagi ang naitulong ng Simbahang Katolika sa natamong kaunlaran ng Pilipinas. Sa pamamagitan ng mga paaralang itinatag nito sa iba't ibang panig ng kapuluan sapul pa noong sakupin tayo ng mga Kastila, ay nabihisan ang Pilipinas ng isang bago at maunlad na kabihisanan. Hinubog tayo sa larangan ng paggawa, agham, paghahalaman at pagsasaka, pangangalakal at pagtuturo. Ipinunla sa ating mga puso ang kadalisayan ng kagandahang asal, pag-ibig at pagkilala sa isang Diyos, pagmamahal sa kapwa, at pag-ibig sa inang bayan. Sa pamamagitan ng mga kabutihang ito ay namulat tayo, tumibay ang ating damdamin at nag-akalang humakbang ng sariling hakbang. At sa lilim ng ating bughaw na langit at malamlam na sikat ng araw ay isa-isang isinilang ang ating mga bayani. Sila ang nanguna sa pagtahak sa gabi ng sigwa upang kalagin ang tanikalang gumagapos sa kamay ng inang bayan. Sa wakas ay nakalaya ang inang bayan, nahawi ang sigwa, at nagbukang liwayway.

Ngayong malaya na tayo ay tingalain natin ang Simbahang Katolika bilang pagtanaw ng utang na loob. Tandaan ninyo balana, na sina Rizal, Mabini, Del Pilar, Bonifacio, Quezon atbp., ay pawang tumanggap ng karunungan sa mga paaralang Katolika. Mula't sapul noong una, hanggang sa kasalukuyan ay patuloy sa paghubog sa kaisipan ng maraming Pilipino ang mga paaralang Katolika sa iba't ibang panig ng kapuluan. Ang bahaging ginampanan ng mga paaralang Katolika sa pagpapaulad ng Pilipinas ay isang bantayog ng kadakilaan, na nauukit sa dibdib ng sambayanang Pilipino. #

— Teodoro Ampuro Bay